

Qaniginerpaasamik annaasaqarsimanerup kingorna aaliasunnerup nalaani sulinngiffeqarsinnaanerup periarfissaalernissaa pillugu apeqquteqaat aallaavigalugu oqallinnissamik siunnersuut

(Inatsisartunut ilaasortaq, Peter Olsen, Inuit Ataqatigiit)

Angajoqqaat meeqqaminnik 18-nik inorlugit ukiulinnik annaasaqartillugit qaammatit arfinillit angullugit akissarsiaqartinneqarluni aliasuuteqarnermi sulinngiffeqarsinnaatitaanissaannut ilumut pisinnaatitaaffinngortissaneripput pillugu oqallisissiatut siunnersuut.

(Inatsisartunut ilaasortaq, Nivi Olsen Demokraatit)

Akissuteqaat

(Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisoq)

Siullermeerneqarnera

Qaniginerpaasamik annaasaqarnermi aliasuuteqarnermi sulinngiffeqarsinnaatitaanissamut ukkataqarnissaq pillugu siunnersuuteqartunut qujanaq. Naalakkersuisut angajoqqaanut qanigisaasunullu annaasaqartarsimasunut misiginneqatiginninnertik oqaatigerusuppaat.

Qaniginerpaasamik annaasaqarneq, meeraappat inersimasuuppalluunniit apeqqutaatinnagu, artornartuuvoq. Aliasunnermik maqaasinermillu equisarput aamma misigissutsit sakkortuut ilungersunartullu suliariniarneri sivisusinnaasarluni. Aamma avatangiisit tamarmik eqqorneqartarput, meeqqat atuaqateqarput, ikinnguteqarput, ilaquataqarput aamma sunngiffimmi attaveqarput.

Naatsorsueqqissaartarfimmiit paasissutissat naapertorlugit ukiuni qulini kingullerni agguaqatigiissillugu inuit 18-it inorlugit ukiullit toqukkut qimaguttut 17-iusarput, amerlanerpaammatalu ukiumut 21-iullutik.

Naatsorsueqqissaartarfimmiit paasissutissat ilanngullugu takutippaat, meeqqat 45 %-ii ajoraluartumik ataatsimik ukioqalernissartik sioqqullugu toqusartut.

Naartunermi, erninermi meeravissartaarnermilu sulinngiffeqartarneq ullormusiaqartarnerlu pillugit Inatsisartut inatsisaanni pisinnaatitaaffinnik peqareerpoq. Meeraq toqugalluni erniuppat imaluunniit meeraq erninermi kingornatigut sapaatit akunnerisa 15-it imaluunniit 19-it siulliit iluanni toquppat, anaanaasoq imaluunniit ataataasoq sulinngiffeqarsinnaatitaapput. Angajoqqaat aamma meeraq toqugalluni erniunerata kingorna sulinngiffeqarnerup ilassutaasup, sapaatit akunneri sisamat angullugit sulinnginnissamut pisinnaatitaavoq. Angajoqqaat erninermut atatillugu sulinngiffeqarnerata nalaanni meeraq toquppat, angajoqqaat tamarmik sapaatit akunneri sisamat atasuinnarmik sulinngiffeqarsinnaatitaapput, meeqqap toquneranut attuumassuteqartumik.

Pisortani imaluunniit namminersortuni atorfillit aamma isumaqatigiissutit ilaanni qanigisaanerpaat toquneranni ulluni arfineq-pingasuni sulinngiffeqarsinnaatitaaneq pillugu isumaqatigiissutigineqarpoq.

Pisortanit ikiorsiissutit suliffeerunnermi, napparsimanermi aamma innuttaasunut allatut imminnut pilersorsinnaanngitsunut pingaarnertut tunniunneqartarput. Tamanna isumaqarpoq,

angajoqqaat meerartik 18-it inorlugit ukioqartoq annaagunikku, sulinngiffeqarnermut atatillugu isumaqatigiissutini pisinnaatitaaffiit pillugit isumaqatigiissutaasut apeqqutaassapput. Eqqaamaneqartariaqarporlu namminersortuni sulisut aamma uani sammineqartumi pineqarmata.

Naalakkersuisut aallaaviatigut ajunngitsutut isigivaat, suliffeqarnermi illuatungeriit isumaqatigininniarnissani aliasuuteqarnermi sulinngiffeqarnissaq pillugu apeqqut ilanngunneqassappat.

Pingaaruteqarpoq suliffeqarnermi illuatungeriit aamma soqutigisaqaqatigiit allat sammisami matumani ilanngutitinneqarnissaat, angajoqqaat meeqqamik 18-it inorlugit ukiulimmik annaasaqarpata, inuiaqatigiinni kikkunnik tamanik kalluaasarmat. Tamatuma saniatigut aliasuuteqarnermi piffissap sivilissusaa aamma angajoqqaat suliffimmut uternissaat pillugit oqallinnissaq pingaaruteqarpoq.

Naalakkersuisut soqutigivaat, aaqqiissutissaq pillugu qanoq iluseqarsinnaaneranut aningaasalersorneqarsinnaanera ilanngullugu Inatsisartut isumassarsianut eqqarsaataat siunnersuutaallu tusassallugit.

Taamatut oqaaseqarlutik Naalakkersuisut qilanaarivaat oqallilluarnissaq.